


Seni Preseten
Thomas S. Monson



Uta usun ew Saram

Ua fen feioch ren ai fiti chommong apwapwan oreni ir mi pachengeni ekkewe efeiochun tempel. Uwa fokkun tonger meinisin, pachonong ewe ekkeran wesino uwa fen fiti non Phoenix, Arizona, USA, non ewe November a no.

Ekkewe Serafon Aramas mi Pin non Fansoun Soponon ra choni non ewe apwapwan oreni ra efisi ekkoch prokram mi amwarar, sise tongeni monukir. Non ewe ier a no non Phoenix, arap ngeni ewe apwapwa, uwa ereni ekkewe chon fiti, “Ami semiriten saram.”

Uwa mochen meinisin ekkewe serafon ei Mwichefen repwe sinei pwe ir semiriten saram. Ir ekkewe sokkun, a wor ew ar sekinin pwe repwe ew “saramen non ei fenufan” (Philippi 2:15). A wor ew wiiser ar repwe afanafana ewe ennetin kapas allim. A wor ar koko pwe repwe uta usun ew esisinen tempel, repwe eningano ewe kapas allim ngeni ew fonufan mi napeno rochopwakun. A wor annukur ar repwe anomu saramer repwe ngetenget me repwe merekuku.

Ren ach sipwe ew “minen appiru ren ekkewe chon nuku” (1 Timothy 4:12), mi auchea kich pwisin sipwe nuku. Sipwe anapano ewe nuku mi murinno ren ach sipwe manau non pekin ngun me asaramano ewe saram ngeni ekoch. Sipwe amari ach kapasen pwarata tori an epwe winiti ew angkon manauach.

Me nein ekkewe auchean aan ach sipwe angei me onomwu ewe nuku mi auchea ngeni kich ikenai ach sipwe aneani me kao ekkewe pukfel me iotek iteitan me fansoun

meinisin. Ngeni ekkewe serafon ei Mwichfen, uwa apasa, ika ouse mwo fori ei, oupwe fori iei ew orenien ami oupwe kao ekkewe pukfel iteitan me iotek. Ika ese wor ekkei ruu auchean foffor, ekkewe pochokunen orenien nukun me ekkewe sokopaten osukosuken manawach mi tongeni ekukkunueno ika fen kunuono omw saram.

Ierin serafon ese mecheres. Ir ekkewe auchean ier nupwen Setan epwe sotunuk me fori unusen an tongeni ne otupukono seni ewe aan minne epwe emwenuk sefan ngeni neniom nang. Nge nupwen oupwe aneani me iotek me nupwen ami oupwe aninis me aneasochis, oupwe ennetin sinefichi ewe saram minne epwe saramano non rochopwak (nengeni D&C 6:21), ach we Nenien Appiru me ach pochokun— ika fen ach we Samon Jises Kraist. I ewe Saram kich sipwe chunata pwe epwe awesano ewe ouchufengenin rochopwak (nengeni 3 Nifai 18:24).

Ren pochokunen kapasen pwarata usun ewe Chon Amanau me An we niwinsefaniton kapas allim, esap tongeni kouk ami oupwe saramano. Ra nonnomw reomw iteitan ran, non sokopaten nonnomun manau oupwe nom non. Nupwen oupwe tapwono murin ewe anen appiru an ach we Chon Amanau, usun akkom, non manauen ekkewe ir mi nonnom remi—ika ir chon ami pwisin famini, chiechiemi chon sukun, chon angang, ika emon oua keran sisinei, ika fen emon ouse mwo nge sisinei.

Nupwen oupwe ew saram ngeni ewe fonufan, aramasen unukumi repwene mefi ew auchean ngun epwene fori

ar repwe chok mochen chiechi ngenikemi me fiti omw anen appiru.

Uwa tingorei ekkewe sam me iin me sou emwenin nouch kewe serafo ar repwe anisir ne uta non pochokun fan iten ennet me pung. Anisi epwe wateno ar kuna ren ekkewe tittin kaeo, ren sineoch, me ren ewe angangen non ewe muun Kot. Aueta non ir pochokun ar repwe pochokun ngeni ekkewe sossotun ei fonufan. Ngenir ewe mochen ar repwe fetan non nimenimoch me nuku, ar repwe ikiotek, me neneta nang usun ar angko mi nukuchar.

Ngeni nouch kewe serafo, uwa apasa, Samach won Nang A men tongei kemi. Amwo oupwe pwan mefi usun ewe tong minne ekkewe sou emwenin ei Mwichafen ra awora fan itemi. Amwo epwe fokkun wor ami mochen pwe oupwe angang ngeni Samach won Nang me Noun we. Me amwo oupwe fetan non ennet me uta pwe oupwe ew saram me nein noun Kot kewe semirit.

AFANAFAN SENI EI POROUS

Ekieki om kopwe poraus ngeni ekkewe ka afanafan ngenir met wewen ach sipwe emon “[semiritin] saram.” Met sekining a kawor? Ka tongeni poraus usun ekkoch fansoun nupwen ar saram a fokkun saramaram me met a efisi an epwe saram. Ekieki omw kopwe eisindir ar repwe ekieki usun emon aramas, usun emon serafo, emon chiechier chon angang, are emon chon ar we famini, ewe a mochen ewe saram. Murin owa tongeni iotek fengen usun ew aanen ami oupwe aea fengen ewe saram.

SERAFO

Esisinen Saram

Preseten Monson a aiti kich pwe ekkewe serafon ei Mwichafen “a wor ar koko ar repwe uta usun ew

esisinen tempel, repwe eningano ewe kapas allim ngeni ew fonufan mi napeno rochopwakun.” A awora ekkoch anen omw kopwe tongeni fori ei:

Afanafana ewe kapas allim

Nuku

Awatteno nuku

Kopwe ew saram ngeni ekkoch

Amamarieta omw kapasen pwarta tori an epwe ew angkon manawom

Anea me kaeo ekkewe pukfel

lotek iteitan me fansoun meinisin

Angang ngeni ekkoch

Anneasochisi

Kopwe pusin aukuku en ika ian ke nomw ian seni 1 tori 5 non ew me nein ekkei napanap. Ren ekkewe napanap mii kukun nampan, ka tongeni kopwe kaeo ekkei itenap non ekewe pukfel are kutter won LDS.org. Murin omw ka kaeo usun ekkei itenap, ka tongeni kopwe ekieki usun anen omw kopwe apochokuna ekkei napanap me awora omw kokot ngeni met kopwe fori.

SEMIRIT

Asaramano Om Saram.

Usun en emon noun Kot, en emon semiriten saram. Kopwe tongeni awatteno saram seni omw tapweno murin ach Chon Amanau, Jises Kraist. Jises Krasit me Samach won Nang ra tongeok me ra mochen en kopwe emon saram ngeni ekkoch me emwenir ngeni Kraist. Ka tongeni saram seni chok pusin en nupwen om tapweno murin ekkewe annuk, sani iotek me anea pukfel. Chuningani ekkoch fuu won echo chon taropwe me esisinner ren ekkoch kokkoten ifa usun kopwe tongeni saramano ngeni ekkoch usun ew anen appiru seni Jises Kraist (ren ew awewe, “feino ngeni fan,” ika “anisi ai famini”)



Nuku, Famini, Aninis

Ekkewe Napanapen Manauen Jises Kraist: Tipetekison me Netipetekison

Anneaochu me ikiotek usun ekkei mettoch me kutta met kopwe tongeni nounou. Ifa usun om weweiti usun manauan me angangen ewe Chon Amanau epwe tongeni anapano om nuku non I me efeiochu ekkewe aramas ka kan tumunu non om angangen an fefin chon amwa? Ren fatafatochun poraus, kopwe nengeni reliefsociety.lds.org.

Iei ew kinikinin fitucho Porausen Fefin Chon Amwa usun ekkewe napanapan manauan ewe Chon Amanau.

Jises a apasa, “pwe ewe emon a nap neimi meinisin, epwe chok usun emon sotuputur, nge ewe a nemenem me neimi epwe emon chon angang. Io a nap, ewe emon a mottiw pwe epwe mongo are ewe emon a angang? esap ii ewe a mottiw pwe epwe mongo? nge ngang uwa nom neimi ussun emon chon angang” (Luke 22:26–27).

“Ewe Chon Amanau ina i nouch we nenien appiru mi napanap ren ewe pochokunen netipetekison me netip mecheres. Pun ina, An a fangeno An mochen ngeni ewe Sam a awora ewe watten, me fen ewe wesen amwararen, mettoch a fis non uruo. Meni me nein ekkewe kapas mi pin non meinisin ekkewe pukfel, ‘esap netipei nge netipom epwe pwonueta’ (Luke 22:42).”¹

Usun emon chon kuno ren Jises Kraist, sia kutta fansoun meinisin ach sipwe usun chok I. “Tipetekison mi auchea ngenikich ach sipwe usun napanapen Kraist,” anon Elter Ulisses Soares seni ekkewe Fik. Ika esap wor rech sisap tongeni ach sipwe anapano ekkoch auchean napanapen nimenimoch. Ach

tipetekison ese wewen pwe ew omw nipwakingaw, nge a wewen pwe ka mosonoson ren omw ka eoch me kisasew, pwarano pochokun, kinamwe, pochokunen pusin en, me ka pusin pochokun won winikapom.”² Ren ach sipwe angang ne anapano ei nongongen manau, sipwe kuna pwe “netipetekison ne fangeno ach mochen ngeni ewe Sam epwe uwei ngeni kich ewe pochokunen Kot—ewe pochokunen netipetekison. Ina ewe pochokun ach sipwe churi sossotun manau, ewe pochokunen kinamwe, ewe pochokunen epinukunuk, ewe pochokunen ewe netip epwe uren tong ren me kapasen pwarata ren ewe Chon Amanau Jises Kraist, ika fen ewe pochokunen amanau.”³

Pwan ekkoch Wokisin

Matthew 26:39; John 5:30; Mosaia 3:19; Ilaman 3:35

Seni ekkewe Pukfel

Ew me nein ekkewe ochun me amwararen fansoun an Kraist afanafan a fis nupwen A tonu pechen noun kewe chon kuno. “Iwe A uta seni ewe chepen, a pwinitatiw ufan we nukun, iwe a ri ngeni nukapan echo taun. Iwe, a ninanong

och konik non ew waspesen, o a poputa ne tonu pechen ekkewe chon kaeo, me a tonupwasa ngeni pecher ewe taun a ri ngeni nukanapan” (John 13:4–5).

Nupwen an ewe Chon Amanau A pwarata ei annuk, eni ekkewe chon kuno ra fokkun ingeno pwe ar we Samon me Masta a fotopukutiw me mwer me fori an netipetekisonun angang. Iwe Jises a awewei ekkewe nesen I a mochen ir me kich meinisin ach sipwe kaeo:

“Ngang ami Samon o pwan nouch sense, nge uwa keran chok tonu pechemi. Iwe oupwe pwan tonu fengeni pechemi.

“Ua ngeni kemi och minen appiru, pun oupwe fori usun chok minne uwa fen for ngeni kemi” (John 13:14–15).

ESINESIN

1. Richard C. Edgley, “The Empowerment of Humility,” *Liahona*, Nov. 2003, 99.
2. Ulisses Soares, “Be Meek and Lowly of Heart,” *Liahona*, Nov. 2013, 9.
3. Richard C. Edgley, “The Empowerment of Humility,” 99.

Ekiki Usun Ekkei

Ifa usun a wor rech netipetekison epwe anisi kich ne tong usun ach we Chon Amanau a fori?